

四庫全書

史部

欽定四庫全書

舊五代史卷二

宋門下侍郎叅知政事監修國史薛居正等撰

梁書第二

太祖紀二

光化元年正月帝遣葛從周統諸將畧地於山東遂次  
於邢洺三月昭宗以帝兼領天平軍節度使餘如故四  
月滄州節度使盧廷彥為燕軍所攻棄城奔於魏魏人

送於汴是月帝以大軍至鉅鹿屯於城下敗晉軍萬餘  
衆於青山口俘馬千餘匹丁卯遣從周分兵攻洛州斬  
刺史邢善益擒將五十餘人五月己巳邢州刺史馬師  
素棄城遁去辛未磁州刺史袁奉滔自剄而死五日之  
內連下三州因以葛從周兼邢州昭義軍節度使留後  
帝遂班師是時襄州節度使趙匡凝聞帝軍有清口之  
敗密附於淮夷七月帝遣氏叔琮率師伐之未幾其泌  
州刺史趙璠越瑯來降隨州刺史趙匡琳臨陣就擒二

年正月淮南楊行密舉全吳之衆精甲五萬以伐徐州  
帝領大軍禦之行密聞帝親征乃收軍而退時幽州節  
度使劉仁恭大舉蕃漢兵號十萬以伐魏遂攻陷貝州  
州民萬餘戶無少長悉屠之進攻魏州魏人來乞師帝  
遣朱友倫張存敬李思安等先屯於內黃帝遂親征三  
月與燕軍戰於內黃北燕軍大敗殺二萬餘衆奪馬二  
千餘匹擒都將單無敵已下七十餘人

通鑑單可及幽州驍將號單無敵

是月葛從周自山東領其部衆馳以救魏翼日乘勝

諸將張存敬以下連破八寨遂逐燕軍北至於臨清壅其殘寇於御河溺死者甚衆仁恭奔於滄州六月帝表丁會為潞州節度使以李罕之疾亟故也又遣葛從周由固鎮路入於潞州以援丁會七月壬辰朔海州陳漢賓擁所部三千奪於淮南戊戌晉人陷澤州帝遣召葛從周於潞留賀德倫以守之未幾德倫為晉人所逼遂棄潞而歸繇是潞州復為晉人所有十一月陝州都將朱簡殺留後李璠自稱留後送款於帝三年四月遣葛

從周以充鄆滑魏之師伐滄州五月庚寅攻德州拔之  
梟刺史傅公和於城上己亥進攻浮陽六月燕帥劉仁  
恭大舉來援從周與諸將逆戰於乾寧軍老鴟隄大破  
之殺萬餘衆俘其將佐馬慎交己下百餘人既而以連  
雨遂班師八月河東遣李進通襲陷洺州執刺史朱紹  
宗帝遣葛從周自鄆縣渡漳水屯於黃龍鎮親領中軍  
涉沙而寨晉人懼而宵遁洺州復平九月帝以仁恭進  
通之入寇也皆繇鎮定為其囊橐即以葛從周為上將

以伐鎮州遂攻下臨城渡滹沱以環其城帝領親軍繼至鎮帥王鎔懼納質請盟仍獻文繒二十萬以犒戎士帝許之十月晉人以帝宿兵於趙遂南下太行急攻河陽留後侯言與都將閻寶力戰固守僅而獲全十一月以張存敬為上將自甘陵發軍北侵幽薊連拔瀛莫二郡遂移軍以攻中山定帥王郜以精甲二萬戰於懷德亭盡殪之郜懼奔於太原遲明大軍集於城下郜季父處直持印鑰乞降亦以繒帛三十萬為獻帝即以處直

代部領其鎮焉是月燕人劉守光赴援中山寨於易水之上繼為康懷英張存敬等所敗斬獲甚衆繇是河朔知懼皆弭伏焉是歲唐左軍中尉劉季述幽昭宗於東宮內立皇子德王裕為帝仍遣其養子希度來言願以唐之神器輸於帝帝時方在河朔聞之遽還於汴大計未決會李振自長安使迴因言於帝曰夫豎刁伊戾之亂所以資霸者之事也今閹豎幽辱天子王不能討無以令諸侯帝悟因請振復使於長安與時宰潛謀反正天



復元年正月乙酉朔唐宰相崔胤潛使人以帝密旨告於侍衛軍將孫德昭已下令誅左右中尉劉季述王仲先等即時迎昭宗於東內御樓反正癸巳降制進封帝為梁王酬反正之功也昭宗之廢也汴之邸吏程巖牽昭宗衣下殿帝聞之召巖至汴折其足送於長安杖殺之是時河中節度使王珂結援於太原帝怒遣大將張存敬率將涉河繇舍山路鼓行而進戊申攻下絳州壬子晉州刺史孟漢瑜舉郡來降帝即以大將侯言權

領晉州何綢權領絳州晉絳平己未大軍至河中存敬  
命繚其垣而攻之壬戌蒲人颺表幡以請降庚午帝至  
河中以張存敬權領河中軍府事河中平帝乃東還是  
月李克用遣牙將張特來聘請尋舊好帝亦遣使報命  
三月癸未朔帝歸自河中是月遣大將賀德倫氏叔琮  
領大軍以伐太原叔琮等自太行路入魏博都將張文  
恭自磁州新口入葛從周以兗鄆之衆自土門路入洛  
州刺史張歸厚以本軍自馬嶺入定州刺史王處直以

本軍自飛狐入晉州侯言自陰地入澤州刺史李存璋棄郡奔歸太原叔琮引軍逼潞州節度使孟遷乞降河東屯將李審建王周領步軍一萬騎二千詣叔琮歸命乃進軍趨太原四月乙卯大軍出石會關營於洞渦驛都將白奉國自井陘入收承天軍張歸厚引兵至遼州刺史張鄂迎降氏叔琮即日與諸軍至陽城下城中雖時出精騎來戰然危蹙已甚將謀遁矣會叔琮以芻糧不給遂班師五月癸卯昭宗以帝兼領護國軍節度使

河中尹六月庚申帝發自大梁丁卯視事於河中以素服出郊拜故節度使王重榮墓尋辟其子瓚為節度判官請故相張濬為重榮撰碑帝自中和初歸唐首依重榮至是思其舊德故恩禮若是七月甲寅帝東還梁邸十月戊戌奉密詔赴長安是時朝廷既誅劉季述以韓全誨張弘彥為兩軍中尉袁易簡周敬容為樞密使是時軍國大政專委宰相崔胤每事裁抑宦官宦官側目胤一日於便殿奏欲盡去之全誨等屬垣聞之嘗於昭宗

前祈哀自訴自是昭宗敕胤每有密奏令進囊封全誨等乃訪京城美婦人十數以進使求宮中陰事昭宗不悟胤謀漸泄中官視胤皆裂以重賂甘言誘藩臣以為城社時因讌聚則相向流涕時胤掌三司貨泉全誨等教禁兵伺胤出聚而呼譟訴以冬衣減損又於昭宗前訴之昭宗不得已罷胤知政事胤怒急召帝請以兵入輔故有是行戊申行次河中同州留後司馬鄴華之幕吏也舉郡來降辛亥駐軍於渭濱華帥韓建遣使奉牋

納款又以銀三萬兩助軍是日行次零口癸丑聞長安  
亂昭宗為閣官韓全誨等劫遷西幸鳳翔蓋避帝之兵  
鋒也翼日遂命旋師夕次於赤水乙卯大軍集於州城  
下韓建惶駭失措即以城降丙辰帝表建權知忠武軍  
事促令赴任同華二州平是時唐太子太師盧知猷等  
二百六十三人列狀請帝速請迎奉己未遂帥諸軍發  
自赤水壬戌次於咸陽頃者云天子昨暮至岐山旦日  
宋文通扈蹕入其闈矣是時岐人遣大將符道昭領兵

萬人屯於武功以拒帝帝遣康懷英敗之擄甲士六千餘衆乙丑次於岐山文通遣使奉書自陳其失請帝入覲丙辰及岐闡文通遣渝約閉壁不獲通復次於岐山是時昭宗累遣使齎朱書御札賜帝遣帝收軍還本道帝診之曰此必文通全誨之謀也皆不奉詔癸酉飛章奉辭且移軍北伐乙亥至邠州節度使李繼徽舉城降繼徽因請去文通所賜李姓復本宗楊氏又請納其帑以爲質帝皆從之仍易其名曰崇本邠州平己丑唐丞

相崔胤京兆尹鄭元規至華州以速迎奉為請許之二  
年正月帝復次於武功岐人堅壁不下乃迴軍於河中  
二月間晉軍大舉南下聲言來援鳳翔帝遣朱友寧帥  
師會晉州刺史氏叔琮以禦之帝以大軍繼其後三月  
友寧叔琮與晉軍戰於晉州之北大敗之生擒克用男  
廷鸞帝喜謂左右曰此岐人之所恃也今既如此岐之  
變動不久矣四月岐人遣符道昭領大軍屯於虢縣康  
懷英帥驍騎敗之丁酉唐丞相崔胤自華來謁帝屢述



艱運危急事不可緩又慮羣閥擁昭宗幸蜀且告帝帝  
為動容皆將辭啓宴於府署帝舉酒皆情激於哀因自  
持樂版聲曲以侑酒帝甚悅座中以良馬珍玩之物賚  
既行命諸將繕戎具五月丁丑帝復西征六月丁丑次  
於虢縣癸未與岐軍大戰自辰至午殺萬餘衆擒其將  
校數百人乘勝遂逼其壘七月丙午岐軍復出求戰帝  
軍不利是月遣孔勅帥師取鳳隴成三州皆下之是時  
岐人相率結寨於諸山以避帝軍帝分兵以討決旬之

內并平之九月甲戌帝以岐軍諸寨連結稍盛因親統  
千騎登高診之時秋空澄霽烟靄四絕忽有紫雲如繖  
益凝於龍旌之上久之方散觀者咸訝之是時帝以岐  
人堅壁不戰且慮師老思欲旋旆以歸河中因密召上  
將數人語其事時親從指揮使高季昌獨前出抗言曰  
天下雄傑竄此舉者一歲矣今岐人已困願少俟之帝  
嘉其言因曰兵法貴以正理以奇勝者詐也乘機集事  
必由是乎乃命季昌密募人入岐以紹之尋有騎士馬

景堅願應命且曰是行也必無生理願錄其孥帝悽然

止其行景固請乃許之明日軍出

北夢瑣言云時因朱友倫總騎軍且至將

大出兵

諸寨屏匿如無人景因躍馬西走直叩岐閭詐

以軍怨東遁為告且言列寨尚留萬餘人俟夕將遁矣

宜速掩之李茂貞信其言

案李茂貞即宋文通此紀前後互異蓋以當時軍機之文

未及改從畫一

遽啓二扉悉衆來寇時諸軍以介馬待之中軍

一鼓百營俱進又分遣數騎以據其闔岐人進不能駐

其趾退不能入其壘殺戮蹂踐不知其數茂貞蹙是喪

胆但閉壁而已十一月癸卯鄜帥李周彝

新唐書作李茂勳茂勳即

周彝也

統兵萬餘人屯於岐之北原與城中舉烽以相應

翼日帝以周彝既離本部鄜時必無守備因命孔勅乘虛襲下之甲寅鄜州平周彝聞之收軍而遁茂貞既失鄜州之援愕然有瓦解之懼繇是議還警蹕誅閹寺以自贖焉三年正月甲寅岐人啓壁唐昭宗降使宣問慰勞兼傳密旨尋又命翰林學士韓渥趙國夫人寵顏齋詔押賜帝紫金酒器御衣玉帶丙辰華州留後李存審

遣飛騎來告青州節度使王師範遣牙將張厚輦甲冑  
弓槊詐言來獻欲盜據州城事覺已擒之矣是日師範  
又遣其將劉郭盜據兗州丁巳昭宗遣中使押送軍容  
使韓全誨已下三千餘人首級以示帝甲子昭宗發離  
鳳翔幸左劔寨權駐蹕帝營帝素服待罪昭宗命學士  
傳宣免之帝即入見稱罪拜伏者數四既而促召升殿  
密通御座且曰宗廟社稷是卿再造朕與戚屬是卿再  
生因解所御玉帶面以賜帝帝亦以玉鞍勒馬金銀器

紋錦御饌酒菓等躬自拜進焉及翠華東行帝匹馬前  
導十餘里宣令止之己巳昭宗至長安謁太廟御長樂  
樓禮畢謂帝曰朕生入舊京是卿之力也自古救君之  
危曾無有如是者況今日再及清廟得親奉觴酒奠於  
先皇帝室前卿之德朕知不能報矣即召帝執手聲淚  
者久之翼日誅宦官第五可範等五百餘人於內侍省  
三月庚辰制以帝為守太尉兼中書令宣武宣義天平  
護國等軍節度使諸道兵馬副元帥加食邑三千戶實

封四百戶仍賜回天再造竭忠守正功臣戊戌帝建旆  
東還昭宗御延喜樓送之既醉遣內臣賜帝御製楊柳  
詞五首三月戊午至大梁時以青州未平命軍士休澣  
以俟東征四月丙子巡師於臨朐亟命逼其城與青州  
兵戰於城下大敗之是夕淮將王景仁以所部援軍宵  
遁帝遣楊師厚追及輔唐殺千人乘勝攻下密州八月  
戊辰以伐叛之柄委於楊師厚帝乃東還九月癸卯師  
厚率大軍與王師範戰於臨朐青軍大敗殺萬餘人并

擒師範第師克即時徙寨以逼其城辛亥偏將劉重霸擒棣州刺史邵播來獻播師範之謀主也帝命斃之戊午師範舉城請降青州平翼日分命將校畧地於登萊淄棣等州皆下之繇是東漸至海皆為梁土也帝復命師範權知青州軍州事師範乃請以錢二十萬貫犒軍帝許之十月辛巳護駕都指揮使朱友倫因擊鞠墮馬卒於長安訃至帝大怒以為唐室大臣欲謀叛已致友倫暴死十一月丁酉青將劉鄩舉兗州來降鄩王師範



之將也師範令竊據兗州久之及聞師範降邠乃歸命  
帝以邠善事其主待之甚優邠署為元帥府都押牙權  
知鄆州畱後天祐元年正月己酉帝發自大梁西赴河  
中京師聞之為之震懼是時將議迎駕東幸洛陽慮唐  
室大臣異議帝乃密令護駕都指揮使朱友諒矯昭宗  
命收宰相崔胤京兆尹鄭元規等殺之又邠岐兵士侵  
逼京畿帝因是上表豎請昭宗幸洛昭宗不得已而從  
之帝乃率諸道丁匠財力同構洛陽宮不數月而成二

月乙亥昭宗駐蹕于陝帝自河中來覲謁見行營因灑  
涕而言曰李茂貞等竊謀禍亂將迫乘輿老臣無狀請  
陛下東遷為社稷大計也昭宗命延于寢室見何皇后  
面賜酒器及衣物何后謂帝曰此後大家夫婦委身于  
全忠矣因歔歔泣下後數日帝開宴于陝之私第請駕  
臨幸翼日帝辭歸洛陽昭宗開內宴時有宮人與昭宗  
附耳而語韓建躡帝之足帝遽出以為圖己因連上章  
請車駕幸洛

十國春秋吳世家三月丁巳唐帝遣問使  
以絹詔告難于我及西川河東等令糾率

藩鎮以圖匡復詔有云朕至洛陽則為全三月丁未昭忠所幽聞詔教皆出其手朕意不得復通矣

宗制以帝兼判左右神策及六軍諸衛事是時昭宗累遣中使及內夫幸洛帝以陝州小藩非萬乘久留之地期以四月內東幸閏月丁酉昭宗發自陝郡壬寅次于穀水是時昭宗左右唯小黃門及打毬供奉內園小兒二百餘人帝猶忌之是日密令醫官許昭遠告變乃設饌于別幄召而盡殺之皆坑于幕下先是選二百餘人形貌大小一如內園人物之狀至是使一人擒二人縊

于坑所即蒙其衣及戎具自飾昭宗初不能辨久而方  
察自是昭宗左右前後皆梁人矣甲辰車駕至洛都帝  
與宰相百官導駕入宮乙卯昭宗以帝為宣武宣義護  
國忠武四鎮節度使時帝請以鄆州援張全義故有此  
命五月丙寅昭宗宴羣臣曰昨來御樓前一夜亡失赦  
書賴梁王收得副本不然誤事宰執不得無過矣是日  
宴次昭宗入內召帝于內殿曲宴帝不測其事不敢奉詔  
又曰卿不欲來即令敬翔入來帝密遣翔出乃止己巳

奉辭東歸乙亥至大梁六月帝遣都將朱友裕率師討  
邠州節度使楊崇本叛故也癸丑帝西征遂朝于洛陽  
七月甲子昭宗宴帝于文思鞠塲乙丑帝發東都壬申  
至河中八月壬寅昭宗遇弒于大內遺制以輝王祝為  
嗣乙巳帝自河中引軍而西癸丑次于永壽邠軍不出  
九月辛未班師十月癸巳至洛陽詣西內臨于梓宮前  
祇見于嗣君辛丑制以業此下  
有闕文帝至自西征十一月癸  
酉光州遣使來求援時光州歸款于帝尋為淮人所攻

故來乞師戊寅帝南征度淮次于霍丘大掠廬壽之境  
淮人乃棄光州而去二年正月庚申進攻壽州壽人堅  
壁不出丁亥帝自霍丘班師二月辛卯帝至自南征甲  
午青州節度使王師範至大梁帝待以賓禮尋表援河  
陽節度使七月辛酉天子賜帝迎鑾紀功碑樹于洛陽  
庚午遣大將軍楊師厚率前軍討趙匡凝于襄州辛未  
帝南征表趙匡凝罪狀削奪官爵八月楊師厚進收唐  
鄧復鄂隨均房等七州帝駐軍漢江北自循江千經度

濟師之所九月甲子師厚于陰谷江口造梁以濟師趙  
匡凝率兵二萬振于江濱師厚麾兵進擊襄人大敗殺  
萬餘衆乙丑趙匡凝焚其舟率親軍載經舸沿漢而遁  
丙寅帝濟江至中流舟壞將沒者數四比及岸舟沉是  
日入襄城帝因周視府署帑藏悉空惟于西廡下有一  
亭牕戶儼然扃鎖甚密遂令破鎖啓扉中有一大匱緘  
鐫甚至又令破其匱內有金銀數百錠帝因歎曰亂兵  
既入公私財貨固無孑遺矣此帑當有陰物主之不令

常人所不得俟我以有之耶遂以百餘錠賜楊師厚襲荊  
州留後趙匡明棄城上陝奔蜀荆襄二州平帝以都將  
賀瓌權領荊州楊師厚權領襄州即表其事十月丙戌  
朔天子以帝為諸道兵馬元帥辛卯帝自襄州引軍由  
光州路趨淮南將發敬翔切諫請班師以全軍勢帝不  
聽壬辰次于棗陽遇大雨頗阻師行之勢軍至壽春壽  
春人堅壁清野以待帝帝乃遷舍于正陽十一月丙辰  
大軍北濟

十國春秋柴再用抄其復軍  
斬首三千級獲輜重萬計

帝至汝陰深悔



淮南之行躁煩尤甚

師友雜志朱全忠嘗與僚佐及遊客坐于大柳之下全忠獨言曰此

樹宜為車轂象莫應有遊客數人起應曰宜為車轂全忠勃然厲聲曰書生輩好順口玩人皆此類也車須用夾轂柳木豈可為之顧左右數十人皆言為車轂者悉撲殺之丁卯帝至自南征辛未

天子命帝為相國總百揆以宣武宣義天平護國天雄

武順佑國河陽義武昭義保義武昭武定泰寧平盧匡

國武寧忠義荆南等二十一道為魏國

案舊唐書尚有忠武鎮國二道

此闕載

進封帝為魏王入朝不趨劔履上殿贊拜不名兼

備九錫之命癸未唐中書門下奏中書印已送相國中

書公事權用中書省印甲申中書門下奏天下州縣名  
與相國魏王家諱同者請易之十二月乙酉朔帝讓相  
國魏王九錫之命丙戌京百司各差官齋本司須知孔  
目竝印赴魏國送納甲午天子以帝堅讓九錫之命乃  
命宰相柳燦來使且述揖讓之意焉丁酉帝又讓九錫  
之命詔畧曰但以鴻名難掩懿實須彰宜且徇于奏陳  
未便行于典冊又改諸道兵馬元帥為天下兵馬元帥  
是時帝以唐朝百官服飾多闕乃製造逐色衣服請朝

廷等第賜之其所給俸錢仍請自來年正月全支三年正月幽滄稱兵將寇于魏魏人乞師且以牙軍驕悍謀欲誅之遣親吏臧延範密告于帝帝陰許之乙丑北征先是帝之愛女適羅氏是月卒于鄴城因以兵仗數千事實于橐中遣客將馬嗣勲領長直軍千人雜以工匠丁夫肩其橐而入于魏聲言為帝女設祭魏人信而不疑庚午夜嗣勲率其衆與羅紹威親軍數百人同攻牙軍遲明盡殺之死者七千餘人洎于嬰孺亦無畱者是

月帝次于內黃聞之馳騎至魏時魏之大軍方與帝軍  
同伐滄州聞牙軍之死即時奔還帝之軍追及歷亭殺  
賊幾千餘衆乃擁大將史仁遇保于高唐帝遣兵圍之  
是月天子詔河南尹張全義部署修制相國魏王法物  
三月甲寅天子命帝總判鹽鐵度支戶部等三司事帝  
再上章切讓之乃止四月癸未攻下高唐軍民無少長  
皆殺之生擒逆首史仁遇以獻帝命支解之未幾又攻  
下澶博貝衛等州皆為魏軍殘黨所據故也是時晉人

圍邢州刺史牛存節堅壁固守帝遣符道昭帥師救之  
晉人乃遁去五月帝畧地于洺州旣而復入于魏七月  
己未自魏班師是日收復相州自是魏境悉平壬申帝  
歸自魏八月甲辰以滄州未平復命北征九月丁卯營  
于長蘆一夕帝夢白龍附于兩肩左右瞻顧可畏恍然  
驚寤十月辛巳邠州楊崇本以鳳翔邠寧涇邠秦隴之  
衆合五六萬來寇屯于美原列十五寨其勢甚盛帝命  
同州節度使劉知俊都將康懷英帥師禦之知俊等大

破邠寇殺二萬餘衆奪馬三十餘匹擒其列校百餘人

楊崇本胡章僅以身免十一月庚戌懷英乘勝進軍遂

收鄜州十二月乙丑帝以文武常叅官每月一五九日

赴朝奏請備廊食詔從之遂自長蘆班師案以上疑有闕文據舊唐

書哀帝紀戊辰李克用與幽州之衆同攻潞州全忠守將丁會以澤潞降太原克用以其子嗣昭為留後甲戌

全忠燒長蘆營旋以寨內糗糧山積帝命焚之滄帥劉軍間潞州陷故也

守文以城中絕食因致書於帝乞留餘糧以救饑民帝

為留十餘囤以與之容齊續筆滄州還師悉焚諸營資糧在舟中者鑿而沈之守文遺全

忠書曰城中數萬口不食數月矣與其焚之為煙沈之  
為泥願乞其所餘以救之全忠為之鬻數困滄人賴以  
濟

舊五代史卷二

舊五代史卷二考證

梁太祖紀二磁州刺史袁奉滔 磁州案歐史磁訛

惠今據新唐書及通鑑改正

是時襄州節度趙匡凝 趙匡凝沿宋諱作趙凝今據

舊唐書及歐陽史增匡字

隨州刺史趙匡琳 趙匡琳沿宋諱作趙璘今增匡字

正月先屯於內黃 案舊唐書及通鑑俱以屯內黃為

三月事



由是潞州復為晉人所有 案澤潞懷三州之下新唐書及通鑑俱作八月歐陽史從是書作七月

洺州復平 案洺州之平通鑑作九月舊唐書及歐陽史俱作八月

連拔瀛莫二州 案新唐書昭宗紀九月甲寅朱全忠陷瀛州十月辛酉陷莫州通鑑與新唐書同攷舊唐書俱作九月事是書俱作十一月

天復元年正月乙酉朔 案乙酉朔通鑑與是書同舊

唐書作甲申攷昭宗本紀癸未夜孫德昭等以兵攻  
劉季述王仲先通鑑作德昭等謀以除夜伏兵俟之  
以癸未為除夜則正朔斷為甲申也作乙酉朔似誤  
癸己降制進封帝為梁王 案全忠進封新舊唐書皆  
作二月與是書作正月異

定州刺史王處直以本軍自飛狐入 案新舊唐書  
王處直三字原本闕今據通鑑增入

會氏叔琮以芻糧不給遂班師 案旋師之期歐陽作

三月是書唐紀作五月又與此紀作四月異

罷肅知政事 案崔肅罷知政事新舊唐書皆作十一

月甲戌與是書異

己丑唐丞相崔肅京兆尹鄭元規至華州 案舊唐書

作十二月己卯崔肅至三原若通鑑作癸未俱與是

書作己丑異

癸未與岐軍大戰 案岐軍之敗新舊唐書皆繫五月

與是書作六月異

願錄其孥 案錄原本訛戮今參攷夢瑣言據文改

正

甲寅鄜州平周彝聞之收軍而遁 案鄜州平新舊唐

書皆繫十二月與是書繫十一月共

華州留後李存審 案李存審三字疑有舛誤攷王師

範傳作崔胤在華州

是日師範又遣其將劉鄩盜據兗州 案劉鄩陷兗州

新舊唐書俱作丙午與是書作丙辰異

昭宗御延喜樓送之 喜原本訛熹今據通鑑改正

戊午師範舉城請降 案師範之降舊唐書作十一月

丁酉新唐書與是書同

朱友倫因擊鞠墮馬卒於長安 友倫九國志趙廷隱

傳作友亮攷歐陽史及通鑑並作友倫九國志訛


護駕都指揮使朱友諒 友諒歐陽史梁紀作友謙誤

攷歐陽史家人傳亦作友諒與是書同

表趙匡凝罪狀削奪官爵 案削奪趙匡凝官爵舊唐

書作八月丁未與是書作七月辛未異

武昭武定泰寧平盧匡國 案武昭原本脫武字匡國  
沿宋諱作章國今據歐陽史增改



舊五代史卷二 攷證

欽定四庫全書

史部

舊五代史卷

八

詳校官編修

臣黃壽齡

洗馬

臣

王坦修覆勘

總校官編修

臣朱

鈐

校對官檢討

臣王福清

謄錄監生

臣任遇春



欽定四庫全書

舊五代史卷三

宋門下侍郎參知政事監修國史薛居正等撰

梁書第三

太祖紀三

開平元年正月丁亥帝迴自長蘆次于魏州節度使羅  
紹威以帝抱軍慮有不測之患由是供億甚至因密以  
天人之望切陳之帝雖拒而不納然心德之壬寅帝至

自長蘆是日有慶雲覆于府署之上甲辰天子遣御史大夫薛貽矩來傳禪代之意貽矩謁帝陳北面之禮帝揖之升階貽矩曰陛下功德及人三靈所卜已定皇帝方議裁詔行舜禹之事臣安敢違既而拜伏于砌下帝側躬以避之二月戊申帝之家廟棟間有五色芝生焉狀若芙蓉紫烟蒙護數日不散又是月家廟第一室神主上有五色衣自然而生識者知梁運之興矣唐乾符中木星入南斗數夕不退諸道都統晉國公王鐸觀之

問諸知星者吉凶安在咸曰金火土犯斗即爲灾惟木  
當爲福耳或亦然之時有術士邊岡者洞曉天文博通  
陰陽歷數之妙窮天下之奇秘有先見之明雖京房管  
輅不能過也鐸召而質之岡曰惟木爲福神當以帝王  
占之然則非福于今必當有驗于後未敢言之請他日  
證其所驗一日又密召岡因堅請語其詳至于三四岡  
辭不獲鐸乃屏去左右岡曰木星入斗帝王之兆也木  
在斗中朱字也以此觀之將來當有朱氏爲君者也天

戒之矣且木之數三其禎也應在三紀之內乎鐸聞之不復有言天后朝有識辭云首尾三鱗六十年兩角犢子自狂顛龍蛇相聞血成川當時好事者解云兩角犢子牛也必有牛姓干唐祚故周子諒彈牛仙客李德裕謗牛僧儒皆以應圖讖爲辭然朱字牛下安八八即角之象也故朱滔朱泚構喪亂之禍冀無妄之福豈知應之帝也四月唐帝御札勅宰臣張文蔚等備法駕奉迎梁朝宋州刺史王臯進赤烏一雙又宰臣張文蔚正押

傳國寶玉冊金寶及文武羣官諸司儀仗法物及金吾  
左右二軍離鄭州丙辰達上源驛是日慶雲見令曰王  
者創業興邦立名傳世必難知而示訓從易避以便人  
案此下  
有闕文或稽其符命應彼開基之義垂諸象德之言爰

攷簡書求于往代周王昌發之號漢帝詢行之文或從  
一德以徽稱或爲二名而更易先王今典布在縑緗寡  
人本名兼于二字且異帝王之號仍兼避易之難郡職  
縣官多須改換况宗廟不遷之業憲章百世之規事叶

典儀宣憚草易寡人今改名晃是以天意雅符于明德  
日光顯契于瑞文昭融萬邦理斯在是庶順玄穹之意  
永臻康濟之期宜令有司分告天地宗廟其舊名中外  
章疏不得更有迴避時將受禪下教以本名二字異帝  
王之稱故改名已未賜文武百官一百六十人本色衣  
一副戊辰即位制曰王者受命于天光宅四海祇事上  
帝寵綏下民草故鼎新諒歷數而先定創業垂統知圖  
籙以無差神器所歸祥符合應是以三正互用五運相

生前朝道消中原政散瞻烏莫定失鹿難追朕經緯風  
雷沐浴霜露四征七伐垂三十年糾合齊盟翼戴唐室  
隨山刊木岡憚胼胝投袂揮戈不遑寢處泊玄穹之所  
贊知廣運之不興莫諧輔漢之謀徒罄事殷之禮唐主  
知英華已竭算祀有終釋龜鼎以如遺推劒紱而相授  
朕懼德弗嗣執謙允恭避駿命于南河眷清風于潁水  
而乃列嶽羣后盈廷庶官東西南北之人班白緇黃之  
衆謂朕功蓋上下澤被幽深宜應天以順時俾化家而

爲國拒彼億兆至于再三且曰七政已齊萬機難曠勉  
遵令典爰正鴻名告天地神祇建宗廟社稷顧惟涼德  
曷副樂推慄若履冰懷如馭朽金行啟祚玉歷建元方  
宏經始之規宣布惟親之令可改唐天祐四年爲開平  
元年國號大梁書載虞賓斯爲令範詩稱周客蓋有明  
文是用先封以禮後嗣宜以曹州濟陰之邑奉唐主封  
爲濟陰王凡曰軌儀並遵故實姬庭多士比是殷臣楚  
國群材終爲晉用歷觀前載自有通規但遵故事之文



勿替在公之効應是唐朝中外文武舊臣見任前資官  
爵一切仍舊凡百有位無易厥章陳力濟時盡瘁事我  
古者興王之地受命之邦集大勲有異庶方霑慶澤所  
宜加等故豐沛著啟祚之美穰鄧有建都之榮用壯鴻  
基且旌故里爰遵令典先示殊恩宜升汴州爲開封府  
建名東都其東都改爲西都仍廢京兆府爲雍州佑國  
軍節度使五代會要四月改京兆府爲大安府長安縣  
爲大安縣萬年縣爲大年縣仍置佑國軍節  
度使額始命韓建  
馬佑國軍節度使是曰大酺賞賜有差通鑑甲辰唐昭  
宣帝降御札禪

位于梁以攝中書令張文蔚為冊禮使禮部尚書蘇循  
副之攝侍中楊涉為押傳國寶使翰林院學士張策副  
之御史大夫薛昭矩為押金寶使尚書左丞趙光逢副  
之帥百官備法駕詣大梁甲子張文蔚楊涉乘輅自上  
源驛至從冊寶諸司各備儀衛南簿前導百官從其後  
至金祥殿前陳之王被袞冕即皇帝位張文蔚蘇循奉  
冊升殿迎讀楊涉張策薛昭矩趙光逢以次奉寶升殿  
讀已降帥百官舞蹈稱賀帝遂與文蔚等宴于元德殿  
帝舉酒曰朕輔政未久此皆諸公推戴之力文蔚等慙  
懼俯伏不能對獨蘇循薛昭矩及刑部尚書張祚盛稱  
帝功德宜  
應天順人  
宋州刺史王臯進兩岐麥陳州袁象先進白

兔一付史館編錄兼示百官詔在京司及諸軍州縣印  
一例鑄換其篆文則各如舊辛未武安軍節度使馬殷

進封楚王以太府卿敬翔知崇政院翔與帷幄之謀故  
首擢焉追尊四代廟號高祖媯州府君上諡曰宣元皇  
帝廟號肅祖太廟第一室陵號興極陵祖妣高平縣君  
范氏追諡宣僖皇后皇曾祖宣惠王上諡曰光獻皇帝  
廟號敬祖第二室陵號永安祖妣秦國夫人楊氏追諡光  
孝皇后皇祖武元王上諡曰昭武皇帝廟號憲祖第三  
室陵號光天祖妣吳國夫人劉氏追諡昭懿皇后皇考  
文明王上諡曰文穆皇帝廟號烈祖第四室陵號咸寧

皇妣晉國太夫人王氏追謚文惠皇后以宣武節度副  
使皇子友文爲開封尹判建昌院事友文本康氏子也  
帝養以爲子是月制宮殿門及都門名額正殿爲崇元  
殿東殿爲元德殿內殿爲金祥殿萬歲堂爲萬歲殿門  
如殿名帝自謂以金德王又以福建上獻鸚鵡諸州相  
繼上白烏白兔洎白蓮之合蒂者以爲金行應運之兆  
故名殿曰金祥以大內正門爲元化門皇牆南門爲建  
國門滴漏門爲啟運門下馬門爲升龍門元德殿前門

爲崇明門正殿東門爲金烏門西門爲玉兔門正衙東門爲崇禮門東偏門爲銀臺門宴堂門爲德陽門天王門爲賓天門皇牆東門爲寬仁門浚儀門爲厚載門皇牆西門爲神獸門望京門爲金鳳門宋門爲觀化門尉氏門爲高明門鄭門爲開明門梁門爲乾象門酸棗門爲興和門封丘門爲含耀門曹門爲建陽門升開封浚儀爲赤縣尉氏封丘雍丘陳留爲畿縣

五代會要四月改左右長真爲

左右龍虎軍左右內衛爲左右羽林軍左右堅銳夾馬突將爲左右神武軍左右親隨軍將馬軍爲左右龍驤

軍五月以唐朝宰臣張文蔚楊涉並爲門下侍郎平章事以御史大夫薛昭矩爲中書侍郎平章事帝初受禪求理尤切委宰臣搜訪賢良或有在下位抱負器業久不得伸者特加擢用有明政理得失之道規救時病者可陳章疏當親鑒擇利害施行然後賞以爵秩有晦跡丘園不求聞遠者令彼長吏備禮邀致冀無遺逸之恨進封河南尹兼河陽節度使張全義爲魏王兩浙節度使錢鏐進封吳越王辛巳有司奏以降誕之日爲大明

節休假前後各一日壬午保義軍節度使朱友謙進百  
官衣二百副乙酉立皇兄全昱爲廣王皇子友文爲博  
王友珪爲郢王友璋爲福王友雍爲賀王友徽爲建王  
辛卯以東都舊第爲建昌宮改判建昌宮事爲建昌宮  
使初帝創業之時以四鎮兵馬倉庫籍繁因總置建昌  
院以領之至是改爲宮蓋重其事也甲午詔天下管屬  
及州縣官名犯廟諱者各宜改換城門卽改爲門局卽  
茂州改爲汶州桂州慕化縣改爲歸化縣潘州茂名縣

改爲越裳縣

魏泰東軒筆錄京師呼城外爲州東州西州南州北而韋城相城非城等縣但呼韋

縣相縣非縣蓋沿梁時避諱之舊也

詔樞密院宜改爲崇政院以知院事

敬翔爲院使改文思院爲乾文院同和院改爲儀鸞院

五代會要五月改御食使爲司膳使小馬坊使爲天驤使

以西都水北宅爲大昌宮

廢雍州太清宮改西都太徽宮亳州太清宮皆爲觀諸

州紫極宮皆爲老君廟泉州僧智宣自西域回進辟支

佛骨及梵夾經律丙申御元德殿宴犒諸軍使劉捍符

道昭已下賜物有差是月青州許州定州三鎮節度使



請開內宴各賜方物以青州節度使韓建守司徒平章  
事帝以建有文武材且詳于稼穡利害軍旅之事籌度  
經費欲盡詢焉思澤特異于時罕有比者隨拜爲上相  
賜賚甚厚宿州刺史王儒進白兔一濮州刺史圖嘉禾  
瑞麥以進廣州進奇寶名樂品類甚多河南尹張全義  
進開平元年已前羨餘錢十萬貫紬六千匹綿三十萬  
兩仍請每年上供定額每歲貢絹三萬匹以爲常式荆  
南高季昌進瑞橘數十顆質狀百味倍勝常貢且橘當

冬熟今方仲夏時人咸異其事因稱爲瑞六月辛乾元  
院宴召宰臣學士及諸道入貢陪臣己亥帝御崇元殿  
內出追尊四廟上謚號玉冊寶共八副宰臣文武百官  
儀仗鼓吹導引至太廟行事癸卯司天監奏日辰內有  
戊字請改爲武從之癸亥詔以前朝官僚譴逐南荒積  
年未經昭雪其間有懷抱材器爲時所嫉者深負冤抑  
仍令錄其名姓盡復官資兼告諭諸道令津致赴闕如  
已亡歿並許歸葬以明恩蕩以西都徽安門北路逼近

大內宮垣兼非民便令移自榆林直趣瑞門之南改耀  
州報恩禪院為興國寺馬殷奏破淮寇靜海軍節度使

曲裕卒七月丙申以靜海軍行營司馬權知留後曲顯

起復為安南都護充節度使

五代會要七月勅建國遷都俾新其制况山河之險

表裏為防今二京俱在關東以內仍以潼關隸陝州復置河潼軍使命虢州刺史兼領之其月勅改武牢關為軍仍置虎牢關軍使已亥追尊皇妣為皇太后八月以潞州軍前

屯師旅壁壘未收乃別議戎帥于是以亳州刺史李思

安充潞州行營都統勅朝廷之儀封冊為重用報勲烈

以隆恩榮固合親臨式光典禮舊章久缺自我復行今

後每封冊大臣宜令有司備臨軒之禮

五代會要八月  
敕諸道所有甲

事申奏令直至右銀臺門委各省使畫  
時引進尋常公事依前四方館收接

甲子平明前老

人星見于南極壬申密州進嘉禾又有合歡榆樹並圖

形以獻是月隰州奏大寧縣至固鎮上下二百里今月

八日黃河清至十日如故九月辛丑西京大內放出兩

宮內人及前朝宮人任其所適勅以近年文武官諸道

奉使皆于所在分外停住踰年涉歲未聞歸闕非惟勞

費州郡抑且侮慢國經臣卽既虧憲章安在自今後兩浙  
福建廣州安南邕容等道使到發許住一月湖南洪鄂  
黔桂許住二十日荆襄同雍鎮定青滄許住十日其餘  
側近不過三五日凡往來道路據遠近里數日行兩驛  
如遇疾患及江河阻隔委所在長吏且事由奏聞如或  
有違當行朝典命御史點檢糾察以儆慢官魏博羅紹  
威二男廷望廷矩年在幼稚皆有材器帝以其藩屏勲  
臣之胄宜受非次之用皆擢為郎恩命既行之後二子

亦就班列紹威乃上章以齒幼未任公事乞免主印宿  
直從之封鎮東軍神祠為崇福侯浙西奏道門威儀鄭  
章道士夏隱言焚修精志妙達希夷推諸輩流實有道

業鄭章宜賜號貞一大師仍名玄章隱言賜紫衣

五代會要

九月置左右天興左右廣勝軍仍以親王為軍使

十月帝以用軍未暇西幸文

武百官等久居東京漸及疑訝令就便各許歸安只留

韓建薛貽矩翰林學士張策韋郊杜曉中書舍人封舜

卿張袞并左右御史司天監宗正寺兼要當諸司節級

外其宰臣張文蔚已下文武百官並先于西京祇候庚午大明節內外臣僚各以奇貨良馬上壽故事內殿開宴召釋道二教對御談論宣旨罷之命閤門使以香合賜宰臣佛寺行香駕幸繁臺講武癸酉御史司憲薛廷珪奏請文武百官仍舊朝恭先是帝欲親征河東命朝臣先赴雒都至是緩其期乃允所奏宰臣請每月初入閤望日延英聽政永為常式山南東道節度楊師厚進納趙匡凝東第書籍先是收復襄漢帝閱其圖書至是

命師厚進馬廣州進獻助軍錢二十萬又進龍腦腰帶  
珍珠枕玳瑁香藥等十一月壬寅帝以征討未罷調補  
為先遂命盡赦逃亡背役髡黥之人各許歸鄉里廣州  
進龍形通犀腰帶金托裏含玳瑁器百餘副香藥珍  
巧甚多廣南管內獲白鹿並圖形來獻耳有兩缺按符  
瑞圖鹿壽千歲變白耳一缺今驗此鹿耳有二缺其獸  
與色皆應金行實表嘉瑞十二月辛亥詔曰潞寇未平  
王師在野攻戰之勢難緩于寇圍飛輓之勤實勞于人



力永言輟來深用軫懷宜令長吏丁寧布告期以兵罷  
之日給復賦租于是人戶聞之皆忘其倦詔故荆南節  
度使守中書令上谷王周訥贈太師故武昌軍節度使  
兼中書令西平王杜洪贈太傅先是鄂渚再為淮夷所  
侵攻圍甚急杜洪以兵食將盡繼來乞師帝料其隔越  
大江難以赴援兼以荊州據上游多戰艦去江夏甚邇  
因命周訥舉舟師沿流以救之訥于是引兵東下纔及  
鄂界遇朗州背盟作亂乘江陵之虛縱兵襲破之俘掠

且盡既而汭士卒知之皆顧其家咸無關志遂為淮寇所敗將卒潰散汭忿恚自投于江汭之本姓犯文穆皇帝廟諱至是因追贈以其系出周文故賜姓周氏及汭兵敗之後武昌以重圍經年糧盡力困救援不至訖為淮寇所陷載洪以送淮師遂殺之此二鎮皆以忠貞歿于王事帝每言諸藩屏翰經綸之業必首痛汭洪之薨至是追贈之深加軫悼各以其子孫宗屬錄用焉隸州蒲臺縣百姓王知嚴妹以亂離并失怙恃因舉哀追感

自截兩指以祭父母帝以遺體之重不合毀傷言念村  
閭何知禮教自今後所在郡縣如有截指割股不用奏  
聞是年諸道多奏軍人百姓割股青齊河朔尤多帝曰  
此若因心亦足為孝但苟免徭役自殘肌膚欲以庇身  
何能療疾並宜止絕

五代會要十二月于輝州碭山縣置崇德軍太祖榆社在碭山置使

以頷之始命朱彥讓為軍使

舊五代史卷三

舊五代史卷三攷證

梁太祖紀三節度使羅紹威 紹威原本作昭威今據

歐陽史改

判建昌院事 案原本脫昌字今增

以青州節度使韓建守司徒平章事 青原本訛清今

改正

癸卯司天監奏日辰內有戊字請改為武從之 案容

齊三筆以為戊類成字故司天詔之不知戊字乃避

梁祖魯祖茂林諱非以其類成字也雲谷雜記嘗辨  
正之今崇福侯廟碑立於開平二年上作武寅足證  
當時避諱之體

是日隰州奏大寧縣至固鎮上下二百里 案是書前  
後多作李固鎮疑原本有脫字考通鑑亦間作固鎮  
蓋當時奏牘省文也今仍之

舊五代史卷三改證

欽定四庫全書

舊五代史卷四

宋門下侍郎參知政事監修國史薛居正等撰

梁書第四

太祖紀四

開平二年正月癸酉帝御金祥殿受宰臣文武百官及諸藩屏陪臣稱賀諸道貢舉一百五十七人見于崇元門封從子友寧為安王友倫為密王幽州劉守文進海

東鷹鵲蕃馬羶罽方物自去冬少雪春深農事方興久  
無時雨兼慮有災疾帝深軫下民二月命庶官遍祀于  
羣望掩瘞暴露令近鎮案古法以禳祈旬日乃雨

是月  
試濟

陰王

帝以上黨未収因議撫巡便住西都赴郊禋之禮乃

下令曉告中外取三月一日離東京以宰臣韓建權判

建昌宮事

五代會要十月以尚書兵部  
侍郎李皎為建昌宮副使

兵部侍郎姚洎

為鹵簿使開封尹博王友文為東都留守辛未契丹主  
按巴堅遣使貢良馬三月壬申帝親統六軍巡幸澤潞



是日寅時車駕西幸宰臣并要切司局皆扈從晚次中  
牟下詔以去年六月後昭義行營陣歿都將吏卒死于  
王事追念忠赤乃錄其名氏各下本軍令給養妻孥三  
年內官給糧賜丁丑幸澤州辛巳以同州節度使劉知  
俊為潞州行營招討使壬午宴扈駕羣臣并勞知俊賜  
以金帶戰袍寶劍茶藥甲申登東北隅逍遙樓蒐閱騎  
乘旌甲滿野丙申招討使劉知俊上章請車駕還東京  
蓋小郡湫隘非久駐蹕之所達覽帝俞其請以鴻臚卿

李從唐室宗屬封萊國公為二王後有司奏萊國公李  
從合畱三廟于西都選地位建立廟宇以備四仲祀祭  
命度支供給以遵彝典四月以吏部侍郎于兢為中書  
侍郎平章事以翰林奉旨學士張策為刑部侍郎平章  
事時帝在澤州拜二相于行在丙午車駕離澤州丁未  
駐蹕于懷州宴宰臣文武百官辛亥至鄭州壬子幸東  
京丙寅車駕幸繁臺觀稼鄆陵居人程震以兩岐麥穗  
并畫圖來進甲寅淮寇侵軼潭岳邊境欲援朗州以戰

艦百餘艘揚帆西上泊鼎口湖南馬殷遣水軍都將黃  
瑀率樓船遮擊之賊衆沿流宵遁追至鹿角鎮詔以戶  
部尚書致仕裴迪復為右僕射迪敏事慎言達吏治明  
籌算帝初建節旄于夷門迪一謁見如故知乃辟為從  
事自是之後歷三十年委四鎮租賦兵籍帑廩官吏獄  
訟賞罰經費運漕事無巨細皆得專之帝每出師即知  
軍州事逮于二紀不出梁之閭閻甚有裨贊之道禪代  
之歲命為太常卿屬年已耆耄視聽昏塞不任朝謁遂

請老許之。朞月復起師。長庶官焉。五月丁丑。王師圍潞州。將及二年。李進通危在旦夕。不俟攻繫。當自降。太原李存勗以厚幣誘結北蕃諸部。竝其境內丁壯悉驅南征。決戰以救上黨之急。部落帳族馳馬勵兵數路齊進。于銅鞮樹寨旗壘相望。王師敗于潞州。己丑。令下諸州。去年有蝗蟲。下子處。蓋前冬無雪。今春亢陽。致為災沴。實傷墾畝。必慮今秋重困稼穡。自知多在荒陂榛蕪之內。所在長吏各須分配地界。精加翦撲。以絕根本。壬辰。

夜火星犯月太史奏災合在荆楚乃令設武備寬刑罰恤人禁暴以穰之軍前行營都將康懷英孫海金已下主將四十三人于右銀臺門進狀待罪帝以去年發軍之日不利有違兵法並釋放兼各賜分物酒食勞問封義昌軍節度使劉守文加中書令封太彭王盧龍軍節度使劉守光封河間郡王許州節度使馮行襲封長樂王是月癸未淮賊寇荊州石首縣襄陽舉舟師沿滬港襲敗之六月辛亥以亢陽慮時政之闕乃詔曰邇者下

民喪禮法吏舞文銓衡既失于選求州鎮又無其舉刺  
風俗未厚獄訟實繁職此之由上遭天譴至是決遣囚  
徒及戒勵中外丙寅月犯角宿帝以其分野在兗州乃  
令長吏治戎事設武備省獄訟恤疲病祈福禳災以順  
天戒丙辰邠岐來寇雍西編戶困于逃避且芟害禾稼  
結營自固踰月同州劉知俊領所部兵擊退襲至幕谷  
大破之俘斬千計收其器甲宋文通僅以身免詔曰敦  
尚儉素抑有前聞斥去浮華期臻至理如聞近日貢奉

競務奢淫或奇巧蕩心或雕鐫溢目徒殫資用有費工庸此後應諸道進獻不得以金寶裝飾戈甲劒戟至于鞍勒不用塗金及雕刻龍鳳如有此色所司不得引進邕州奏鑄鄣山僧法通道璘有道行各賜紫衣是月壬戌岳州為淮賊所據帝以此郡五嶺三湘水陸會合之地委輸商賈靡不由斯遂令荆湘湖南北舉舟師同力致討王師既集淮夷毀壁焚郭而遁秋七月甲戌大霖雨陂澤泛溢頗傷稼穡帝幸右天武軍河亭觀水幸高

僧臺閱禁衛六軍詔曰車服以庸古之制也貴賤無別  
罪莫大焉應內外將相許以銀飾鞍勒其刺史都將內  
諸司使以降祇取用銅異定尊卑永為條制仍令執法

官糾察之

五代會要載七月敕曰祭祀之儀有國大事  
如開官吏慢于恪恭牲具禮容有異精審宜

令御史臺疏  
其條件奏聞

癸巳以禪代已來思求賢哲乃下令搜訪

牢寵之期以好爵待以優榮各隨其材咸使登用宜令  
所在長吏切加搜訪每得其人則疏姓名以聞如在  
下位不能自振者有司薦導之如任使後顯立功勞別加



遷陟勅禁屠宰兩月甲午以高明門外繁臺為講武臺  
是臺西漢梁孝王之時嘗按歌閱樂于此當時因名曰  
吹臺其後有繁氏居于其側里人乃以姓呼之時代綿  
寢雖官吏亦從俗焉帝每登眺蒐乘訓戎宰臣以是事  
奏而名之八月辛亥勅應有暴露骸骨各委差人埋瘞  
兩浙錢鏐奏請重鑄換諸州新印詔禁戢諸軍節級兵  
士及供奉官受旨殿直以下各脩禮敬甲寅太史奏壽  
星見于南方兩浙錢鏐奏改管內紫極宮為真聖觀改

臨安縣廣義鄉為衣錦鄉

十國春秋吳越世家八月梁敕封唐山縣為吳昌縣唐興

縣為天台縣又敕升杭越等州為大都督府復改新城縣曰新登長城縣曰長興樂成曰樂清避梁諱也甲

子夜東方有大流星光明燭地有聲如裂帛唐州上言

白龍見圖形以進九月丙子太原軍出陰地關南牧寇

掠郡縣晉絳有備帝慮諸將翫寇乃下詔親議巡幸命

有司備行丁丑翠華西狩宰臣翰林學士崇政院使金

吾仗及諸司要切官皆扈從餘文武百官竝在東京壬

午達雒陽帝御文思殿受朝叅許汝孟懷牧守來朝澤

州刺史劉重霸面陳破敵之策癸未西幸宿新安丙戌  
至陝州駐蒲雍同華牧守皆進鎧甲騎馬戈戟食味方  
物幽州都將康君紹等十人自蕃賊寨內來投又幽州  
騎將高彥章八十人騎先在并州乃于晉州軍前來降  
至是到行在皆賜分物衣服放歸本道以示懷服丁亥  
至陳州賜宴扈從官戊子延州賊軍寇上平關又太原  
軍攻平陽烽火羽書晝夜繼至乙丑六軍統軍牛存節  
黃文靖各領所部將士赴行在甲午太原步騎數萬攻

逼晉絳踰旬不克知大軍至乃自焚其寨至夕而遁福  
州貢玳瑁琉璃犀象器并珍玩香藥奇品海味色類良  
多價累千萬十月己亥上在陝兩浙節度使奏于常州  
東州鎮殺淮賊萬餘人獲戰船一百二隻以行營左廂  
步軍指揮使賀瓌為左龍虎統軍以左天武軍夾馬指  
揮使尹皓為輝州刺史以右天武都頭韓瑋為神捷指  
揮使左天武第三都頭胡賞為右神捷指揮使仍賜帛  
有差以解晉州圍之功也以尹皓部下五百人為神捷

軍乙巳御內殿宴宰臣扈從官共四十五人丙午御毬場殿宣夾馬都指揮使尹皓韓瑋以下將士五百人賜酒食庚戌至西都御文明殿辛亥宰臣百寮起居于殿前遂宣赴內宴賜方物有差丁巳至東都已未大明節諸道節度刺史各進獻鞍馬銀器綾帛以祝壽宰臣百官設齋相國寺壬戌御宣和殿宴宰臣文武百官十一月辛未御宣和殿宴宰臣文武百官以大駕還京故也庚辰御宣和殿宴宰臣文武百官出開明門登高僧臺

閱兵諸道節度使刺史各進賀冬田器鞍馬綾羅等戊子賜文武百官帛乙未又宴宰臣文武百官于宣和殿

通鑑癸巳中書侍郎同平章事張策以刑部尚書致仕以左僕射楊涉同平章事

十二月立二

王三恪南郊禮儀使狀伏以詩稱有客書載虞賓實因禪代之初必行興繼之命俾之助祭式表推恩兼垂恪敬之文別示優崇之典徵于歷代襲用舊章謹按唐朝以後魏元氏子孫韓國公為三恪以周宇文氏子孫為介國公隋朝楊氏子孫為鄴國公為二王後今伏以國

家受禪封唐朝子孫李從為萊國公今參詳合以介國

公為三恪鄴國公萊國公為二王後

五代會要十二月改左右天武為龍

虎軍左右龍虎為天武軍左右天威為羽林軍左右羽林為天威軍左右英武為神武軍左右神武為英武軍前朝置龍虎六軍謂之衛士至是以天武神武英武等六軍易其軍號而任勲舊焉癸丑獵畋于含耀門外

開平三年正月戊辰朔帝御金祥殿受宰臣翰林學士稱賀文武百官拜表于東上閣門已巳奉遷太廟四室神主赴西京太常儀仗鼓吹導引齋車文武百官奉辭

于開明門外甲戌發東都百官扈從次中牟縣乙亥次  
鄭州丙子次汜水縣河南尹張宗奭河陽節度使張歸  
霸並來朝戊寅次偃師縣己卯備法駕六軍儀仗入西  
都是日御文明殿受朝賀詔曰近年以來風俗未泰兵  
革且繁正月燃燈廢停已久今屬創開鴻業初建洛陽  
方在上春務達陽氣宜以正月十四十五十六日夜開  
坊市門一任公私燃燈祈福庚寅親享太廟辛卯祀昊  
天上帝于圓丘是日降雪盈尺帝昇壇而雪霽禮畢御



五鳳樓宣制大赦天下賜南郊行事官禮儀使趙光逢  
以下分物甲午上御文思殿宴羣臣賜金帛有差丙申

賜文武官帛有差命宣徽使王殷押絹一萬足并茵褥

圖帶二百六十件賜張宗奭

歐陽史丙申羣臣上尊號曰齊文聖武廣孝皇帝

改西京貞觀殿為文明殿含元殿為朝元殿二月改思

政殿為金鑾殿勅東都曰自昇州作府建邑為都未廣

邦畿頗虧國體其以滑州酸棗縣長垣縣鄭州中牟縣

陽武縣宋州襄邑縣曹州戴邑縣許州扶溝縣鄆陵縣

陳州太康縣等九縣宜並割屬開封府仍昇為畿縣

輿地

廣記朱梁時楊氏據江淮于是吳越錢氏上言以淮寇未平恥聞逆姓請改松陽縣為長松

丁酉宴

羣臣于崇勲殿甲辰又宴羣臣于崇勲殿蓋藩臣進賀

勉而從之丙午宗正寺請修興極永安光天咸寧諸陵

並令添修上下宮殿栽植松柏制可癸亥勅豐沛之基

寢園所在悽愴動闕于情理充奉自繫于國章宜設陵

臺兼升縣望其輝州碭山縣宜為赤縣仍以本縣令兼

四陵臺令同州節度使劉知俊奏延州都指揮使高萬

興部領節級家累三十八人來降三月以萬興檢校司徒為丹延等州安撫招討等使辛未詔曰同州邊隅繼有士衆歸化暫思巡撫兼要指揮今幸蒲陝取九日進發甲戌車駕發西都百官奉辭于師子門外丁丑次陝州已卯次解縣河中節度使冀王友謙來奉迎庚辰至河中府幸右軍舊杏園講武丙戌以朔方節度使兼中書令韓遜為潁川王遜本靈州牙校唐末據本鎮朝廷因而授以節鉞四月丙申朔駐蹕河中壬寅辰時駕巡

于朝邑縣界焦黎店冀王友謙及宗政內諸司使扈從  
至申時迴己亥御前殿宴宰臣及冀王友謙扈從官甲  
寅宴宰臣及扈從官于內殿制易定節度使王處直進  
封北平王福建節度使王審知封閩王廣州節度使劉  
隱封南平王同州節度使劉知俊封大彭郡王山南東  
道節度使楊師厚封弘農郡王五月乙丑朔朝遂命宰  
臣及文武百官宴于內殿己卯車駕至西京癸未御崇  
勲殿宴宰臣及文武官四品以上己丑復御崇勲殿宴

宰臣文武官四品以上升宋州為宣武軍節鎮仍以毫  
輝潁為屬郡六月庚戌同州節度使劉知俊據本郡反  
制令削奪劉知俊在身官爵仍徵發諸軍速令進討如  
有軍前將士懷忠烈以知機賊內朋徒憤脅從而識變  
便能梟夷逆豎擒獲凶渠務立殊功當行厚賞活捉得  
劉知俊者賞錢一萬貫文便授忠武軍節度使並賜莊  
宅各一所如活捉得劉知浣者賞錢一千貫文便與除  
刺史有官者超轉三階無官者特授兵部尚書如活捉

得劉知俊骨肉及近上都將竝梟送闕廷者賞賜有差  
辛亥駕至蒲陝文武百官于新安縣奉迎劉知俊弟內  
直右保勝指揮使知浣自雒奔至潼關右龍虎軍十將  
張溫以上二十二人于潼關擒獲劉知浣送至行在敕  
劉知浣逆黨之中最為頭角龍虎軍親兵之內實冠爪  
牙昨者攻取潼關率先用命尋則擒獲知浣最上立功  
頗壯軍威將除國難所懸賞格便可支分許賜官階固  
須除授但昨捉獲劉知浣是張溫等二十二人一時向

前共立功效其賞錢一千貫文數內一百貫文與最先打倒劉知浣衙官李稠四十三貫文與十將張溫二十人各與錢四十二貫八百五十文立功勅命便授郡府亦緣同時立功人數不少所除刺史難議偏頗宜令逐月共支給正刺史料錢二百貫文數內十將張溫一人每月與十貫文餘二十一人每月每人各分九貫文仍起七月一日以後支給人與轉官職仍勘名銜分析申奏當與施行是月知俊奔鳳翔同州平七月乙丑勅行

宮將士陣歿者咸令所在給槨槨津置歸鄉里戰卒聞之悉感涕丙寅命宰臣楊涉赴西都以孟秋享太廟改章善門為左右銀臺門其左右銀臺門卻改為左右興善門敕大內皇牆使諸門素來未得嚴謹將令整肅須示條章宜令控鶴指揮應于諸門各添差控鶴官兩人守帖把門其諸司使并諸司諸色人竝勒于左右銀臺門外下馬不得將領行官一人輒入門裏其逐日諸道奉進客省使于千秋門外排當抗勒控鶴官昇擡至內



門前準例令黃門殿直以下舁進輒不得令諸色一人到千秋門內其興善門仍令長官闕鎖不用逐日開閉是日又敕皇牆大內本尚深嚴宮禁諸門豈宜輕易未當條制交下因循苟出入之無常且公私之不便須加鈐轄用戒門閭宜令宣徽院使等切准此處分進封幽州節度使河間郡王劉守光為燕王

通鑑七月癸酉帝發陝州乙亥至洛

陽寢疾

己丑夕寢殿棟折詰旦召近臣諸王視棟折之迹

帝慘然曰幾與卿等不相見君臣對泣久之遂詔有司

釋放禁人從八月朔日後減膳進素食禁屠宰避正殿  
修佛事以禳其咎商州刺史李稠棄郡西奔本州將吏  
以都牙校李玖權知州事八月甲午以秋稼將登霖雨  
特甚命宰臣以下禱于社稷諸祠詔曰封嶽告功前王  
重事祭天肆覲有國恒規朕以眇身恭臨大寶既功德  
未敷于天下而灾祥訝降于城中慮于告謝之儀有缺  
齋虔之禮爰修昭報用契幽通宜令中書侍郎平章事  
于兢往東嶽祭拜禱祀訖聞奏又勅朕以干戈尚熾華

夏未寧宜循卑菲之言用致雍熙之化起八月一日常  
朝不御金鑾崇勲兩殿只于便殿聽政辛亥制諸郡如  
有陣歿將士仰逐都安存家屬如有弟兄兒姪便給與  
衣糧充役贈故山東道節度使畱後王珣太保贈故同  
州觀察判官盧匪躬工部尚書珣故河陽將累以軍功  
為郡守主畱事于襄陽為小將王求所殺匪躬嘗為劉  
知俊判官知俊反不偕行為亂兵所害勅建國之初用  
兵未罷諸道章表皆繫軍機不欲滯畱用防緩急其諸

道所有軍事申奏宜令至右銀臺門委客省畫時引進  
諸道公事即依前四方館准例收接司天臺奏今月二  
十七日平明前東南丙上去山高三尺以來老人星見  
測在井宿十一度其色光明闊大敕所在長吏放雜差  
役兩稅外不得妄有科配自今後州縣府鎮凡使命經  
過若不執勅文券並不得妄差人驢及取索一物已上  
又今歲秋田皆期大稔仰所在切如條流本分納稅及  
加耗外勿令更有科索切戒所繇人更不得于鄉村乞

託擾人閭八月襄陽叛將李洪差小將進表帝示以舍  
宏特賜敕書慰諭又制左馮背叛元惡遁逃如聞相濟  
之徒多是脅從之輩若能迴心向國轉禍全身當與加  
恩必不問罪仍令同華雍等州切加招諭如能梟斬溫  
韜或以鎮寨歸化必加厚賞仍獎官班兼委本界招復  
人戶切加安存已卯幸西苑觀稼

舊五代史卷四

舊五代史卷四攷證

梁太祖紀四二月 案通鑑二月癸亥酖殺濟陰王于  
曹州新唐書昭宣帝紀亦云二月遇弑歐陽史作正  
月己亥卜郊于西都弑濟陰王與諸書異

辛巳以同州節度使劉知俊為潞州行營招討使 案  
辛巳歐陽史通鑑俱作壬午

時帝在澤州拜二相于行在 案通鑑云癸巳張文蔚  
卒癸卯楊涉罷為右僕射是二相之拜以代文蔚涉

也又承旨學士梁代避諱改為奉旨通鑑及歐陽史  
仍作承旨

壬子幸東京 案五代春秋作丙午帝還東都歐陽史  
作壬子至津州惟通鑑與是書同

淮寇侵軼潭岳邊境 侵軼原本作侵軼今據文改正  
王師敗于潞州 案潞州之敗歐陽史作五月己丑通  
鑑作壬申

帝以此郡五嶺三湘水陸會合之地 此郡原本作北



郡今據文改正

時代綿寢 綿寢原本作綿浸今據通鑑注改正丙戌  
至陝州 丙戌通鑑作乙酉

丁巳至東都 案通鑑考異引編遺錄作乙卯實錄作  
丁巳今攷五代春秋作丁巳與是書同歐陽史作丁  
未與是書異

許州扶溝縣 案扶溝下原本脫縣字今據文增入

甲寅福建節度使王審知封閩王廣州節度使劉隱封

南平王 甲寅通鑑作庚子與是書異

如活捉得劉知浣者賞錢一千貫文 案一千原本作

一萬今據通鑑長編引梁代賞功之典改正

辛亥駕至蒲陝 案通鑑作癸丑帝至陝與是書前後  
異

其興善門仍令長官關鎖 興善原本作章善今據上

文及五代會要改正

舊五代史卷四考證

欽定四庫全書

舊五代史卷五

宋門下侍郎參知政事監修國史薛居正等撰

梁書第五

太祖紀五

開平三年九月癸巳朔御崇勲殿宴羣臣文武百官賜  
張宗奭楊師厚白綾各三百匹銀鞍轡馬丁酉上幸崇  
政院宴內臣賜院使敬翔直學士李班等繪綵有差以

門下侍郎平章事薛昭矩判建昌宮事兼延資庫使制  
內外使臣復命未見便歸私第者朝廷命使臣下奉行  
惟於辭見之儀合守敬恭之道近者凡差出使往復皆  
越常規或已辭而尚在本家或未見而先歸私第但從  
已便莫稟王程在禮敬而殊乖置典章而私舉宜令御  
史臺別具條流事件具黜罰等奏聞庚子殿直王唐福  
自襄城走馬以大軍勝捷逆將李洪歸降事上聞賜唐  
福絹銀有加宰臣百官上表稱賀壬寅開封府虞侯李

繼業齎襄州都指揮使陳暉奏狀以今月五日殺戮逆

黨千人竝生擒都指揮使傅霸以下節級共五百人收

復襄州人戶歸業

通鑑八月陳暉軍至襄州李洪逆戰大敗王求死九月丁酉拔其城斬叛

兵千人執李洪楊虔等送洛陽斬之

癸卯帝御文明殿以收復襄漢受宰

臣以下稱賀辛亥侍中韓建罷守太保左僕射同平章

事楊涉罷守本官以太常卿趙光逢為中書侍郎平章

事翰林學士奉旨工部侍郎知制誥杜曉為尚書戶部

侍郎平章事詔曰秋冬之際陰雨相仍所司擇日拜郊

或慮臨時妨事宜令別更擇日奏聞是月禮儀使奏據所司擇十月二日祀園丘今參詳十月十七日以後入十一月節十一月二日冬至一陽生之辰宜行親告之禮從之河中奏准宣詔使有銅牌者所至即易騎以遣十月癸未大明節帝御文明殿設齋僧道召宰臣翰林學士預之諸道節度刺史及內外諸司使咸有進獻詔以寇盜未平凡諸給過所並令司門郎中員外郎出給以杜姦詐十一月癸巳朔帝齋於內殿不視朝甲午日

長至五更一點自大內出於文明殿受宰臣以下起居  
自五鳳樓出南郊左右金吾太常兵部等司儀仗法駕  
鹵簿及左右內直控鶴等引從赴壇文武百官太保韓  
建以下班以候帝升壇告謝司天臺奏冬至日自夜半  
後祥風微扇帝座澄明至曉黃雲捧日丙申畋於上東  
門外戊戌制曰夫嚴親報本所以通神明流澤覃休所  
以惠黎庶斯蓋邦家不易之道皇王自昔之規敢歎大  
猷茲惟古義粵朕受命於今三年何曾不寅畏晨興焦

勞夕惕師唐虞之典上則於乾功挹殷夏之源下涵於  
民極欲使萬方有裕六辨無愆然而志有所未孚理有  
所未達致奸宄作釁旱暵為災驕將守邊擁牙旗而背  
義積陰馭氣陵王燭以干和載攷休徵式昭至警朕是  
以仰高俯厚靡惜於責躬履薄臨淵冀昭於玄覽兢兢  
慄慄夙夜匪寧及夫動干戈而必契靈誅陳犧齋而克  
章善應苟非天垂丕佑神贊殊休則安可致夷丸渠就  
不戰之功變沴戾氣作有年之慶況靈旗北指喪犬羊於亂



轍之間飛騎西臨下邳翟若走丸之易息一隅之煙燧  
復千里之封疆而又掃蕩左馮討除峴首故得外戎內  
夏益知天命之攸歸喙息歧行共識皇基之永固仰懷  
昭應欲報無階爰因南至之辰親展園丘之禮茲惟大  
慶必及下民乃宥渙汗之私以錫叛羸之幸所冀漸增  
蘇息亟致和平噫朕自臨御以來歲時尚邇氛昏未殄  
討伐猶頻甲兵須議於餽糧飛輶頻勞於編戶事非獲  
已慮若納隍宜所在長吏倍切撫綏明加勉諭每宮中

抽差徭役禁猾吏廣歛貪求免至流散靡依凋弊不濟  
宜令河南府開封府及諸道觀察使切加鈐轄刺史縣  
令不得因緣賦歛分外擾人凡關庶獄每望輕刑只候  
纔罷用軍必當便議優給德音節文內有未該者宜令  
所司類例條件奏聞己亥以羅周翰為天雄軍節度副  
使知府事從鄴王紹威請也辛丑幸穀永戊午御文明  
殿冊太傅張宗奭太保韓建受冊畢金吾仗引昇輅車  
儀仗導謁太廟訖赴尚書省上幸榆林坡閱兵教諸都

馬步兵教改乾文院為文思院行殿為興宅殿毬場為  
興安毬場又改弓箭庫殿為宣武殿靈州奏鳳翔賊將  
劉知俊率邠岐秦涇之師侵迫州城帝遣陝州康懷英  
華州寇彥卿率兵攻迫邠寧以緩朔方之寇

五代春秋  
十一月秦

人來侵靈州陝州康懷英侵秦克寧慶  
行三州秦人來襲懷英兵敗於昇平

十二月乙丑臘

較獵於甘泉驛以蒲州肇迹之地且因經畧廊延於是  
巡幸數月暇日游豫至焦梨店頗述前事念王重榮舊  
功下詔褒獎而封崇之國子監奏創造文宣王廟仍請

率在朝及天下現任官僚俸錢每貫每月尅一十五文  
充土木之植允之是歲以所率官僚俸錢修文宣王廟  
福建節度使王審知奏捨錢造寺一所請賜寺額勅名  
大梁萬歲之寺仍許度僧四十九人贈牢牆使王仁嗣  
司空故同州押衙史肇右僕射押衙王彥洪高漢詮丘  
奉言仇瓊並刑部尚書王筠御史司憲初劉知俊將叛  
謀會諸將詢所宜仁嗣等持正不撓悉罹其酷至是褒  
贈之劉守光上言於薊州西與兄守文戰生擒守文

開平四年正月壬辰朔帝御朝元殿受百官稱賀用禮樂也勅公事難於稽遲居處悉皆遙遠其逐日當直中書舍人及吏部司封知印郎官少府監及篆印文兼書寫告身人吏等並宜輪次於中書側近宿止乙未帝出師子門至榆林坡下閱教壬寅辛保寧毬場錫宴宰臣及文武百官賜宰臣張宗奭已下分物有加賜廣王分物賜湖南開元寺禪長老可復號惠光大師仍賜紫衣二月乙丑幸甘水亭出師子門幸榆林東北陂教諸軍

兵事賜潞州投歸軍使張行恭錦服銀帶並食戊辰宴  
於金鑾殿甲戌以春時無事頻命宰臣及勲戚宴於河  
南府池亭辛巳楊師厚赴鎮於陝寒食假諸道節度使  
郡守勲臣競以春服賀又連清明宴以鞍轡馬及金銀  
器羅錦進者追千萬乃御宣威殿宴宰臣及文武官四  
品以上己丑出光政門至穀水觀麥一月壬辰幸崇政  
院宴勲臣己亥幸夫驥院宴侍臣壬寅幸甘水亭宴宰  
臣勲戚翰林學士辛亥宴宰臣於內殿丙辰於興安毬

場大饗六軍樂春時也四月壬戌詔曰追養以祿王者  
推歸厚之恩欲靜而風人子抱終身之感其以刑部尚  
書致仕張榮及三品四品常參官二十二人先世各追  
贈一等乙丑宴崇政院帝在藩及踐阼勵精求理深戒  
逸樂未嘗命堂上歌舞是日止令內妓升階擊鼓弄曲  
甚懼至午而罷丁卯宋州節度使衡王友諒進瑞麥一  
莖三穗通鑑友諒獻瑞麥帝曰豐年為上瑞今宋州大水安用此為詔除本縣令名遣使詰責友諒  
丙戌幸建春門閱新樓至七里屯觀麥召從官食於樓

河南張昌孫及蒲同主事吏賜物各有差帝過朝邑見鎮將位在縣令上問左右或對曰宿官秩高帝曰令長字人也鎮使捕盜耳且鎮將多是邑民柰何得居民父母上是無禮也至是勅天下鎮使官秩無高卑位在邑令下葉縣鎮遏使馮德武於蔡州西平縣界殺戮山賊擒首領張漬等七人以獻鎮海軍節度使錢鏐擊高澧於湖州大敗之梟夷擒殺萬人拔其郡湖州平先是澧以州叛入淮南故詔鏐討之也五月己丑朔以連雨不



止至壬辰御文明殿命宰臣分拜祠廟自朔旦至癸巳  
內外以午日奉獻巨萬計馬三千蹄餘稱是復相率助  
修內壘甲辰詔曰竒邪亂正假偽奪真旣刑典之不容  
宜犯違而勿赦應東西兩京及諸道州府創造假犀玉  
真珠腰帶壁珥竝諸色售用等一切禁斷不得輒更造  
作如公私人家先已有者所在送納長吏對面毀棄如  
行勅後有人故違必當極法仍委所在州府差人檢察  
收捕明行處斷魏博節度使守太師兼中書令鄴王羅

紹威薨帝哀慟曰天不使我一海內何奪忠臣之速也  
詔贈尚書令六月己未朔詔軍鎮勿起土功七月壬子  
宴宰臣河南尹翰林學士兩街使於甘水亭丙辰宴羣

臣於宣威殿賜物有差劉知俊攻逼夏州

通鑑七月岐王與汾涇二

帥各遣使告晉請合兵攻定難節度使李仁福晉王遣振武節度使周德威將兵會之合五萬衆圍夏州以

宣化軍留後李思安為東北面行營都指揮使陝州節  
度使楊師厚為西路行營招討使福州貢方物獻桐皮  
扇廣州貢犀玉獻船上薔薇水時陳許汝蔡潁五州境

內有鵲為災俄而許州上言有野禽羣飛蔽空旬日之間食鵲皆盡是歲乃大有秋八月車駕西征己巳次陝府是時憫雨且命宰臣從官分禱靈迹日中而雨翼日止帝大悅辛未老人星見是日晏本府節度使楊師厚及扈從官於行宮賜師厚帛千匹仍授西路行營招討使丙子宴文武從官軍使已下設龜茲樂賜物有差九月丁亥朔命宰臣于競赴西都祀昊天上帝於圜丘甲午至西京下詔曰朕聞歷代帝王首推堯舜為人父母

孰比禹湯睿謀高出於古先聖德普聞於天下尚或卑躬待士屈已求賢俯仰星雲慮一民之遺逸網羅巖穴恐片善之韜藏延爵祿以徵求設丹青而訪召使其為政樂在進賢蓋繇國有萬機朝稱百揆非才不治得士則曷自朕光宅中區迄今三載宵分輟寐日旰忘餐思共力於廟謀庶永清於王道而乃朝廷之內或未盡於曷言軍旅之間亦罕聞於奇策眷言方岳下及山林豈無英奇副我延佇諸道都督觀察防禦使等或勲高翊

世或才號知人必於塗巷之賢備察芻蕘之士詔到可  
精搜郡邑博訪賢良諭之以千載一時約之以高官美  
秩諒無求備惟在得人如有卓犖不羈沈潛自負通霸  
王之上略達文武之大綱究古今刑政之源識禮樂質  
文之變朕則待之不次委以非常用佐經綸豈勞階級  
如或一言拔俗一事出羣亦當舍短從長隨才授任大  
小方圓之器寧限九流溫良恭儉之人難誣十室勉思  
薦舉勿至因循俟爾發揚慰予翹渴仍從別勅處分辛

丑以久雨命宰臣薛貽矩榮定鼎門趙光逢祠嵩岳勅  
魏博管内刺史比來州務竝委督郵遂使曹官擅其威  
權州牧同於閑冗俾循通制宜塞異端竝依河南諸州  
例刺史得以專達壬寅頒奪馬令先是王師擊賊獲馬  
多上獻至是盡止之蓋欲邀其奮擊之功也乙巳王師  
敗蕃寇於夏州初劉知俊誘沙陀振武賊帥周德威涇  
原賊帥李繼鶯合步騎五萬大舉欲俯拾夏臺節度使  
李仁福兵力俱乏以急來告先是供奉官張漢攻宣諭

在壁國禮使杜廷隱賜幣於夏及石堡寨聞賊至以防  
卒三百人馳入州既而外兵圍合廷隱漢玫與指揮使  
張初李君用率州民防卒與仁福部分固守晝夜戮力  
踰月及郿延援至大軍奮擊敗之河東郿岐賊分路逃

遁夏州圍解

通鑑甲申遣夾馬指揮使李遇劉綰自郿  
延趨銀夏李遇等至夏州岐管兵皆解去

丙午詔曰劉知俊貴為方伯尊極郡王而乃背誕朝恩  
竄投賊壘固神人之共怒諒天地所不容雖命討除尚  
稽擒戮宜懸爵賞以大功名必有忠貞咸思憤發有生

擒劉知俊者賞錢千萬授節度使首級次之得孟審登  
者錢百萬除刺史得孫亢卓瓌劉儒張鄰等賞有差  
卯宴會羣臣於宣威殿

舊五代史卷五



舊五代史卷五攷證

梁太祖紀五襄州都指揮使陳暉 按歐陽史作行營

招討使左衛上將軍陳暉

復收襄州人戶歸業 按歐陽史云九月壬寅陳暉克

襄州據是書則陳暉以壬寅奏捷非以是日克城攷

通鑑克城繫九月丁酉與是書今月五日正合歐陽

史蓋據奏捷之日而書之耳

以收復襄漢受宰臣以下稱賀 按襄漢下原本衍收

字今刪

并令司門郎中員外郎 司門原本作司閤考五代會

要有司門郎中今改正

故得外戎內夏 內夏原本訛作內憂今據文改正

卓亥宴宰臣於內殿 按原本脫宴字今增入

鎮海軍節度使錢鏐擊高澧於湖州大敗 按九國志

高澧以三年十月叛四年二月奔吳是書繫於四月

蓋以奏聞之月為據

劉知俊攻逼夏州 按五代春秋八月晉人秦人侵夏  
與是書及通鑑異

甲午至西京 按五代春秋作九月己丑帝還西都歐  
陽史同通鑑作己丑上發陝甲午至洛陽

國禮使杜廷隱 廷隱原本作定隱下文仍作廷隱今  
據九國志改

舊五代史卷五考證